



Sesida dals

28 d'avrigl 2020

Communitgà ils

29 d'avrigl 2020

Protocol nr.

344

Incumbensa da la fracziun da la PPS

concernent ina clausula davart il nivel dals pretschs / avantatg per indigens

Resposta da la Regenza

A chaschun d'ina radunanza plenara speziala ils 15 da november 2019 han ils chantuns deliberà unanimamain la revisiun da la Cunvegna interchantunala davart las acquisiziuns publicas (CIAPrev) per mauns da la procedura da participaziun chantunala. Cun quai vulan els realisar sin plaun chantunal la Cunvegna da la OMC davart las acquisiziuns publicas (GPA) che conceda a las interpresas svizras in access al martgà extendì da var 80 – 100 milliardas dollars per onn. Grazia a la CIAPrev vegnan stgaffids andaments d'acquisiziun pli moderns e pli flexibels ed in'unificaziun claramain pli gronda cumpareglià cun oz da las prescripziuns en il dretg d'acquisiziun chantunal che vegn applitgà en ils chantuns, en las citads ed en las vischnancas. Il medem mument effectuescha la CIAPrev in'armonisaziun uschè gronda sco pussaivel cun la Lescha federala davart las acquisiziuns publicas (LAP; CS 172.056.1) ch'è vegnida revedida sin plaun federal.

A chaschun da la debatta parlamentara davart la nova LAP durant la sessiun da zercladur 2019 è vegnì integrà en l'enumeraziun da l'art. 29 al. 1 LAP – en divergenza dals sbozs da lescha elavurads cuminaivlamain da la Confederaziun e dals chantuns – il criteri d'agiudicaziun "ils differents nivels dals pretschs en ils pajais, en ils quals la prestaziun vegn furnida". Quest criteri duai però vegnir resguardà mo observond las "obligaziuns internaziunals da la Svizra". En il sector da contracts internaziunals na datti da bel principi nagin spazi per resguardar ils differents nivels dals pretschs al lieu da prestaziun ester. En il sector simpel (uschenumnà sector da contracts betg internaziunals) exista ultra da quai ina limitaziun pervia da la Cunvegna d'acquisiziun bilaterala tranter la Svizra e l'Uniun europeica (UE). Sin il martgà intern da la UE, al qual la Svizra ha in access liber grazia a questa cunvegna d'acquisiziun, valan pia ils principis dal tractament naziunal e da la nondiscriminaziun er en cas d'acquisiziuns simplas. Questa obligaziun internaziunala (lianta) vegniss violada tras in criteri d'agiudicaziun che taxescha prestaziuns da pajais da la UE sin basa da differents nivels dals pretschs u da la differenta capaciad da cumpra. Ils experts da dretg consultads dals chantuns n'enconuschan nagins stadis commembers da la GPA u da la UE che avessan integrà en lur urdens d'acquisiziun criteris cumparegliabels per dischavantagiar offerents externs.

A chaschun da lur radunanza plenara speziala han ils chantuns refusà cun 19 cunter 7 vuschs e 0 abstenziuns d'integrar in tal criteri en la CIAPrev perquai ch'il champ d'applicaziun è fitg limità, perquai ch'igl è fitg difficil da realisar quest criteri en la pratica e perquai ch'el chaschuna gronda lavur birocratica. En il rom da la consultaziun èsi vegnì rendì attent al fatg, ch'il nov dretg da concordat sa focusseschia pli fitg sin qualitad, duraivladad ed innovaziun e ch'ils posts d'acquisiziun han pia instruments pli adattads per tegnair quint dals giavischs dals offerents svizzers orientads al martgà naziunal. Ils chantuns vulan exequir lur acquisiziuns sut cundiziuns da concorrenza e duvrar cun quità ils daners da taglia mess a disposiziun sco er profitar en quest connex – cun pauca lavur administrativa en proceduras chapavlas – da las novas libertads d'agir cun las novas finamiras. Da las fermezzas dal mastergn indigen vegni uschia tegnì quint il meglier cun surdar incaricas dal maun public. Ils chantuns èn actualmain londervi ad elavurar ils agids d'execuziun (mussavia cuminaivel davart las acquisiziuns, fegliets infurmativs). En questas instrucziuns d'agir vegnan sensibilisads ils posts d'acquisiziun per las novas finamiras e per ils novs instruments da la CIAPrev a favur da l'economia indigena.

Tar il punct 1: En sia missiva tar la participaziun a la CIAPrev vegn la Regenza ad explitgar al Cussegl grond tge avantatgs ch'il nov dretg d'acquisiziun porscha als participants dal martgà svizzers e tge libertads d'agir a favur dal mastergn indigen ch'il maun public survegn tras il nov concordat.

Tar il punct 2: Tenor ils experts da dretg consultads dals chantuns n'èsi betg permiss als chantuns da normar sin via dal dretg d'execuziun novs criteris d'agiudicaziun (generals abstracts) sco ina clausula dal nivel dals pretschs u autras praticas discriminantas. Per sclerir questas dumondas da dretg e per giuditgar tge adattaziuns da la CIAPrev che ston eventualmain vegnir fatgas pervia dal svilup da l'economia dirigi da COVID-19 vegn la Regenza a tschentar danovamain ed explicitamain ina dumonda a l'Organ interchantunal per las acquisiziuns publicas (INAP).

Sin basa da questas explicaziuns propona la Regenza al Cussegl grond d'acceptar l'incumbensa qua avant maun concernent il punct 1 e da la midar sco suonda concernent il punct 2: La Regenza sclerescha tar il INAP l'admissibladad d'ina clausula dal nivel dals pretschs u da disposiziuns sumegliantas en il dretg d'execuziun dals chantuns ed in basegn d'adattar la CIAPrev pervia da las consequenzas da COVID-19.



En num da la Regenza

Il president:

Il chancelier:

A handwritten signature in black ink, appearing to be "Chr. Rathgeb".

A handwritten signature in black ink, appearing to be "Daniel Spadin".

Dr. Chr. Rathgeb

Daniel Spadin